



**KEMENTERIAN WILAYAH PERSEKUTUAN**

**TEKS UCAPAN  
YB DATUK SERI UTAMA TENGKU ADNAN BIN TENGKU MANSOR  
MENTERI WILAYAH PERSEKUTUAN**

**KENDURI 1 WILAYAH PERSEKUTUAN**

**PARLIMEN BANDAR TUN RAZAK**

**Bismillahirrahmanirrahim**

**Salutasi**

**Assalamualaikum Warahmatullahi Wabarakatuh  
Dan Salam Sejahtera**

1. Marilah sama-sama kita panjatkan kesyukuran ke hadrat Allah swt kerana dengan izin dan limpah kurnia Nya kita dapat bersama-sama pada hari ni dalam Program Kenduri 1Wilayah Persekutuan sempena Sambutan Hari Wilayah Persekutuan tahun 2017.
2. Kita semua amat bertuah kerana Negara Malaysia sentiasa dan masih lagi dalam keadaan aman. Kita boleh mengadakan majlis sebegini dengan selesa, beribadah dan beriadah dengan tenang tanpa sebarang ketakutan. Kuncinya adalah perpaduan, saling menghormati dan kerjasama antara satu sama lain.
3. Lantaran itu, soal perpaduan dan saling menghormati ini perlu sentiasa diterap dan disemai; dan kita patut bersyukur kerana kerajaan yang mentadbir negara ini mampu mengekalkan keamanan dan mengutamakan kepentingan rakyat serta kesejahteraan negara.

**Tuan-tuan dan Puan-puan yang dihormati sekalian,**

4. Kenduri 1Wilayah Persekutuan merupakan program *signature* Sambutan Hari Wilayah Persekutuan di bawah kluster program mesra rakyat. Kenduri 1Wilayah Persekutuan ini telah mula kita

laksanakan sejak tahun 2011. Sebelum ini kita laksanakan secara serentak di ketiga-tiga Wilayah Persekutuan tetapi kini bagi mendekati rakyat secara lebih akrab, maka program ini dilaksanakan secara berperingkat mengikut Parlimen di sepanjang bulan Februari. Kita mendapati program ini amat memberi impak yang positif kepada warga Wilayah Persekutuan khususnya dalam jalinan ukhwah sesama insan dan dapat menyatukan pelbagai kaum dengan penglibatan semua pihak dalam penganjuran program kenduri ini.

5. Saya dapat lihat kerjasama serta perpaduan sesama ahli komuniti berganding bahu merewang untuk memasak makanan serta penyediaan khemah dan aktiviti-aktiviti lain bagi memeriahkan dan membangkitkan suasana kenduri. Program ini turut menjadi landasan dalam usaha Kementerian Wilayah Persekutuan menzahirkan keseimbangan pembangunan modal insan warga Wilayah Persekutuan melalui pengisian aktiviti yang melibatkan penyertaan komuniti. Pasti program kenduri ini menjadi salah satu elemen penting dalam memacu perpaduan dan kestabilan sosial khususnya di kalangan warga kota.
6. Saya amat berbesar hati dengan kerjasama yang diberikan oleh Pusat-Pusat Khidmat Masyarakat, badan-badan bukan Kerajaan, Persatuan-Persatuan Penduduk, Majlis Perwakilan Penduduk serta Dewan-Dewan Perniagaan yang sentiasa bersedia menghulurkan tangan untuk bersama-sama Kementerian dalam menyokong segala usaha yang dilaksanakan oleh Kerajaan khususnya.

7. Penganjuran Kenduri 1Wilayah Persekutuan 2017 ini akan memberikan peluang kepada semua warga Wilayah Persekutuan untuk merasai kemeriahan suasana kenduri walaupun kita tinggal di Bandar. Sambil menjamu selera dengan menu yang dimasak sendiri secara bergotong royong di kalangan ahli jawatankuasa perumahan serta komuniti yang terlibat pastinya dapat menghidupkan kembali budaya tradisi zaman datuk nenek kita dahulu yang semakin luntur ditelan zaman.
  
8. Selain aktiviti rewang, saya difahamkan pelbagai aktiviti lain turut diadakan termasuk senamrobik, pertandingan mewarna, sukaneka, persembahan pentas, pertandingan futsal dan gerai pameran. Semua pertandingan semestinya menawarkan pelbagai hadiah menarik kepada peserta termasuk hadiah cabutan bertuah iaitu motosikal, basikal dan televisyen.

**Tuan-tuan dan Puan-puan yang dihormati sekalian,**

9. Saban tahun, tarikh 1 Februari amat bermakna kepada kita semua sebagai warga Wilayah Persekutuan dengan sambutan Hari Wilayah Persekutuan bagi memperingati pengisytiharan Kuala Lumpur, Putrajaya dan Labuan sebagai Wilayah Persekutuan. Kementerian Wilayah Persekutuan mula mengadakan sambutan sejak tahun 2004. Sambutan pada tahun ini merupakan sambutan yang ke-13.

10. Saya yakin dengan tema sambutan ‘Wilayah Ceria, Rakyat Sejahtera’ bertepatan dengan aspirasi Kementerian Wilayah Persekutuan yang ingin menjadikan Wilayah Persekutuan Kuala Lumpur, Putrajaya dan Labuan sebagai sebuah bandar yang ceria merangkumi persekitaran yang bersih; kemudahan pengangkutan yang kondusif; sistem pengangkutan yang sistematik dan seterusnya meningkatkan produktiviti warga Wilayah Persekutuan.
11. Harapan saya dengan slogan ini, ia mampu merangsang seluruh warga Wilayah agar seiringan dengan Kementerian Wilayah Persekutuan bagi memajukan serta memakmurkan bumi Wilayah Persekutuan yang tercinta ini.

**Tuan-tuan dan Puan-puan yang dihormati sekalian,**

12. Untuk makluman tuan-tuan dan puan-puan, Kementerian sentiasa berusaha untuk memberikan perkhidmatan yang terbaik kepada rakyat. Oleh itu, pelbagai inisiatif mensejahterakan rakyat sentiasa dilaksanakan bagi memastikan rakyat mendapat manfaat yang terbaik daripada usaha yang dibuat.
13. Saya difahamkan bahawa pengguna LRT terpaksa menggunakan parking Medan Selera Sri Permaisuri sehingga pengunjung tiada tempat parking dan menjejaskan perniagaan di medan selera tersebut. Oleh itu bagi menyelesaikan masalah ini, kadar bayaran percuma bagi 2 jam pertama dan hanya RM1 bagi setiap jam

tambahan akan dilaksanakan. Saya mengharapkan agar Persatuan Penjaja dapat menguruskan kawasan tersebut dengan baik. Ini membuktikan kesungguhan Kerajaan dalam membantu menyelesaikan permasalahan penduduk di sini.

14. Banjir kilat juga didapati sering berlaku di kawasan ini. Saya minta pihak DBKL untuk mengkaji dan seterusnya menaiktaraf sistem perparitan bagi mengelakkan banjir kilat berlaku lagi. Begitu juga dengan masalah parking yang sangat mendesak sama ada di Sri Penara atau pun di Bandar Sri Permaisuri. Bagi menyelesaikan masalah ini kawasan siar kaki yang sangat lebar di kawasan tertentu perlu dicecilkan bagi membolehkan parking tambahan disediakan. Kita juga akan pertimbangkan untuk menggunakan kawasan tanah di bawah pencawang TNB di Sri Penara untuk dijadikan kawasan parking kereta. Pengecualian saman ke atas kenderaan di tepi jalan akan diteliti semula sehingga kawasan parking telah disediakan.
15. Kebanyakan penduduk di kawasan ini menggunakan perkhidmatan LRT untuk ke tempat kerja dan perkara ini amat baik sekali kerana menyahut saranan Kerajaan menggunakan perkhidmatan awam. Oleh itu perbincangan dengan pihak LRT supaya kekerapan perkhidmatan ditambah pada waktu puncak bagi menampung jumlah pengguna yang ramai.
16. Pihak Kementerian melalui DBKL akan meneliti semula perancangan agar mempercepatkan pembinaan Sekolah Agama Rakyat baru di

Bandar Sri Permaisuri bagi memastikan anak-anak mendapat pendidikan agama yang sewajarnya. Saya faham ketiadaan sekolah agama di sini menyukarkan penduduk untuk menghantar anak jauh dari kawasan tempat tinggal. Peruntukan untuk membaik pulih serta menyelenggara gelanggang futsal dan memasang penghawa dingin di dewan komuniti akan dipertimbangkan demi keselesaan penduduk di sini.

17. Selain itu, Kerajaan turut menyediakan Perkhidmatan bas sekolah secara percuma telah memberi manfaat kepada 8,072 pelajar yang merupakan anak-anak penghuni rumah Program Perumahan Rakyat dan Perumahan Awam di sekitar ibu kota. Pendekatan ini merupakan inisiatif baharu kerajaan bagi menangani kemiskinan bandar serta mengurangkan beban dan kos sara hidup.
18. Kementerian melalui DBKL dan Pejabat Cawangan juga sering menganjurkan program-program pembersihan dan pengindahan yang dibuat secara berjadual. Ini adalah sebahagian usaha yang dibuat untuk mengurangkan gejala-gejala penyakit yang berbahaya seperti demam denggi, zika, demam kepialu dan banyak lagi penyakit yang boleh menular jika kita tidak menjaga kebersihan. Oleh itu, kepada semua ahli komuniti Parlimen Bandar Tun Razak, marilah kita bersama-sama menjalankan tanggungjawab menjaga kebersihan dan keindahan serta keceriaan parlimen ini sekaligus menjaga kebersihan ibu kota yang disayangi.

19. Aktiviti penyelenggaraan kemudahan awam dan perumahan penduduk juga seringkali dibuat oleh DBKL bagi memastikan kesejahteraan penduduk terjaga. Oleh itu, saya ingin menyeru kepada semua penduduk serta kerjasama daripada Majlis Perwakilan Penduduk (MPP) agar memastikan vandalisme tidak berlaku di kawasan perumahan yang diduduki. Sayangi dan gunalah dengan sebaiknya segala kemudahan yang disediakan demi kemaslahatan bersama.

**Tuan-tuan dan Puan-puan yang dihormati sekalian,**

20. Adalah diharapkan kesemua program yang diatitkan ini diharapkan mendapat komitmen dan penyertaan sepenuhnya rakyat daripada pelbagai lapisan masyarakat khususnya warga Wilayah Persekutuan untuk sama-sama merasai kemeriahan Sambutan Hari Wilayah Persekutuan.

21. Akhir kata, saya ingin mengucapkan setinggi-tinggi penghargaan kepada Jawatankuasa Penganjur Kenduri 1Wilayah Persekutuan Parlimen Bandar Tun Razak dan semua pemimpin masyarakat setempat yang telah bertungkus lumus dan memberikan kerjasama yang amat baik sekali dalam penganjuran program pada hari ini. Semoga segala usaha murni kita ini akan diberkati oleh Allah swt.

22. Dengan ini, saya mengakhiri ucapan saya dengan Wabillahi Taufik Wal hidayah. Wassalamualaikum Warrahmatullahi Wabarakatuh.